

27 JAN 2003

NAM-Forum/I

DR M DAN TPM AKAN BERUCAP PADA FORUM PERNIAGAAN NAM

KUALA LUMPUR, 27 Jan (Bernama) -- Perdana Menteri Datuk Seri Dr Mahathir Mohamad dan timbalannya, Datuk Seri Abdullah Ahmad Badawi akan berucap pada Forum Perniagaan Pergerakan Negara-negara Berkecuali (NAM) bulan depan, menurut Institut Strategi dan Kepimpinan Asia (Asli) hari ini.

Dr Mahathir akan bercakap mengenai "Building a New World Order-Sustaining Peace, Sharing Global Prosperity" (Membina Orde Dunia Baru-Mengekalkan Keamanan, Berkongsi Kemakmuran Global) pada 23 Feb manakala Abdullah akan berucap pada jamuan malam pada malam yang sama.

Forum Perniagaan NAM akan diadakan pada 23-24 Feb di Hotel Sunway Lagoon Resort di Petaling Jaya sempena Sidang Kemuncak NAM Ke-13 yang akan diadakan dari 20-25 Feb di Pusat Dagangan Dunia Putra (PWTC) di sini.

Forum itu bertujuan meningkatkan lagi kerjasama perniagaan Selatan-Selatan.

Forum Perniagaan NAM dilancarkan dengan rasminya oleh Menteri Luar Datuk Seri Syed Hamid Albar dengan melancarkan logonya. Beliau turut menyaksikan majlis menandatangani perjanjian antara penganjur acara itu, Asli dan rakan kongsi acara itu.

Beberapa ketua negara dan kerajaan juga akan berucap pada "Sesi Khas Pemimpin NAM" pada forum itu. Mereka termasuk Presiden Afrika Selatan Thabo Mvuyelwa Mbeki, Perdana Menteri Thailand Thaksin Shinawatra, Perdana Menteri India Atal Bihari Vajpayee dan Presiden Indonesia Megawati Soekarnoputri.

Acara dua hari itu akan menumpukan untuk meningkatkan strategi daya saing serantau dan nasional bagi mengekalkan prestasi pertumbuhan, merapatkan jurang pembangunan, perdagangan dan digital serta peranan NAM dalam persekitaran dunia yang sentiasa berubah.

Forum Perniagaan NAM akan bertindak sebagai wadah bagi pembuat keputusan tertinggi dan pemimpin perniagaan dalam negara-negara NAM dengan tumpuan untuk memperkukuhkan kerjasama serantau dan dua hala serta membincangkan isu-isu perniagaan yang mempunyai impak ke atas kerjasama Selatan-Selatan.

Forum perniagaan itu dianjurkan dengan kerjasama Wisma Putra dan Persatuan Selatan-Selatan Malaysia (MASSA).

Rakan kongsi bagi acara itu ialah Commerce International Merchant Bank, DRB-Hicom, Multi Purpose Holdings, Nestle, Ranhill, Southern Bank, Tenaga Nasional, UEM Renong, TV3, New Straits Times, Persekutuan Dewan Perniagaan dan Industri India dan Persekutuan Industri India.

Untuk berita berkaitan NAM, sila layari www.nam2003.com

-- BERNAMA

MFZ MFJ RHM